

# Usahawan wanita ke peringkat global

Oleh SITI AIRUNNISA ALAUI  
airunnisa.alau@utusan.com.my

**B**AGI mengiktiraf serta menggalakkan sumbangan usahawan-usahawan wanita dalam pembangunan ekonomi negara, Hari Wanita Kebangsaan 2017 yang bakal diraikan pada 4 September depan mengangkat tema *Wanita: Pengubah Ekonomi Global* selaras dengan harapan kerajaan untuk meningkatkan jumlah usahawan wanita ke peringkat global.

Menurut rekod SME Corporation Malaysia (SME Corp), sebanyak 20.6 peratus wanita di negara ini terlibat dalam bidang keusahawanan dan dijangkakan meningkat sehingga 23 peratus menjelang tahun 2020. Justeru itu, Kementerian Pembangunan Wanita, Keluarga dan Masyarakat berada pada landasan yang tepat apabila menyoal peningkatkan sehingga 10 peratus jumlah usahawan wanita dalam keusahawanan kecil dan sederhana ke peringkat global menjelang tahun 2020.

Bertepatan ke arah merealisasikan tema itu, sempena sambutan Hari

Wanita Kebangsaan yang bakal diadakan di Hotel Berjaya Times Square, Kuala Lumpur, negara bakal menjadi tuan rumah penganjuran Sidang Kemuncak Perdagangan Wanita Global dan Dialog TN50 Wanita yang dijangka dihadiri Perdana Menteri, Datuk Seri Najib Tun Razak dan isteri, Datin Seri Rosmah Mansor.

Menurut Menteri Pembangunan Wanita, Keluarga dan Masyarakat, **Datuk Seri Rohani Abdul Karim**, penganjuran sidang kemuncak perdagangan itu bakal dihadiri lebih 1,500 peserta dari seluruh negara termasuk ahli Persekutuan Perdagangan dan Industri Wanita Antarabangsa (IWFIC).

Pertubuhan itu melibatkan beberapa negara luar antaranya Rusia, Vietnam, Korea, Mongolia, Australia, Singapura, Indonesia, India dan Filipina.

Tambah beliau,



**PELBAGAI** bentuk bantuan dan inisiatif kerajaan diperkenalkan bagi membantu usahawan wanita melangkah ke peringkat global. GAMBAR HIASAN

penganjuran berkenaan juga memberi ruang kepada golongan usahawan wanita pelbagai latar belakang berkongsi idea, pengalaman, aspirasi serta paling penting mempromosikan produk untuk memasuki peringkat global.

“Tidak dinafikan ramai usahawan wanita di negara ini telah menyumbang dalam pembangunan ekonomi negara.

“Seharusnya mereka diraikan dan dihargai kerana membantu negara meningkatkan modal insan dalam sektor pekerjaan.

“Melalui sambutan ini kita memberi ruang dan platform yang tepat buat wanita mengembangkan pencapaian mereka pada peringkat global, terutama dalam bidang perniagaan yang diceburi selepas pelbagai bentuk insentif diberikan kerajaan.

“Kementerian juga berharap

sekurang-kurangnya satu peratus daripada usahawan bawah SME Corp yang menyertai pameran pada penganjuran persidangan ini dapat menembusi pasaran antarabangsa,” katanya.

Dalam pada itu Rohani memberitahu, kerajaan telah menyediakan pelbagai bentuk bantuan dan inisiatif, serta latihan keusahawanan seperti program Pembangunan Wanita (Dewi), sebagai langkah pemerkasaan ekonomi wanita.

“Kesemua bidang fokus yang melibatkan kesejahteraan wanita ini berada dalam perhatian Kementerian termasuk juga isu-isu bukan berkaitan ekonomi.

“Oleh itu, Kementerian berusaha untuk menyediakan segala keperluan golongan ini dan sudah pastinya sempena sambutan ini, Perdana Menteri pasti ada sesuatu yang manis untuk dikhabarkan,” katanya.

Gambar: MOHD NAJIB MOHD NOR



**ROHANI ABDUL KARIM**

UTUSAN MALAYSIA

f rona wanita utusan mal



## PENGISIAN SAMBUTAN HARI WANITA KEBANGSAAN

### Pertandingan *Winnovation*

Pertandingan berkonsepkan inovasi ini diperkenalkan sempena sambutan Hari Wanita Antarabangsa pada 8 Mac hingga 30 Jun lalu bertujuan menggalakkan wanita menyumbang idea dan inovasi. Penyertaan terbuka kepada semua wanita berumur 21 tahun.

### Kaunter Laluan Khas untuk Wanita

Menyediakan kaunter laluan khas buat golongan wanita bermula 25 Ogos hingga 8 September ini, iaitu selama dua minggu sempena sambutan Hari Wanita Kebangsaan.

### Khutbah Jumaat - 1 September 2017

Jabatan Kemajuan Agama Islam bersetuju membaca teks khutbah Jumaat berdasarkan tema Hari Wanita Kebangsaan, *Wanita: Pengubah Ekonomi Global*.

### Sidang Kemuncak Perdagangan Wanita Global

PLATFORM bagi menggalakkan wanita melangkah ke peringkat global. Bakal menyaksikan pembentangan oleh individu-individu berjaya. Antaranya, Presiden Persatuan Rangkaian Usahawan Wanita (WENA), Nadira Yusof; Pengasas Goget,

Franchesca Chia; dan Ketua Komunikasi Korporat Standard Chartered, Mastura Adnan.

### Dialog TN50 Wanita

Mencungkil aspirasi wanita melalui platform TN50 sebagai satu usaha mendapatkan pandangan daripada kaum Hawa bagaimana untuk membentuk masa depan Malaysia bagi tempoh 2020 hingga 2050.

### Rawatan spa percuma

Kerjasama dengan dua spa terkenal di sekitar Lembah Klang, iaitu Yoyoy Kamphora Spa dan D Aura Spa untuk menawarkan perkhidmatan spa kesihatan percuma sempena sambutan Hari Wanita Kebangsaan pada tahun ini. Mereka berminat boleh layari laman Facebook *Jabatan Pembangunan Wanita* untuk mendapatkan kata kunci dan maklumat terkini.

### Geral dan pameran

Terdapat 32 geral disediakan termasuk geral usahawan luar negara sempena penganjuran Hari Wanita Kebangsaan dan sempena penganjuran Sidang Kemuncak Perdagangan Wanita Global. Dijangkakan 12 negara akan terlibat antaranya Rusia, Vietnam, Singapura, Indonesia, India dan Filipina. Penyertaan untuk slot pameran dan geral masih dibuka.



**USAHAWAN** wanita dialu-alukan menyertai pameran sempena Hari Wanita Kebangsaan pada 4 September ini. GAMBAR HIASAN